

## Kuukomboa Wakati

*Amka, wewe usinziaye, ufufuke katika wafu. Na Kristo atakuangaza. Basi angalieni sana jinsi mnavyoenenda,... mkiukomboa wakati kwa maana zamani hizi ni za uovu. Waefeso 5:14-16.*

**T**unaishi katika kipindi muhimu sana cha historia ya ulimwengu huu. Hatima ya umati mkubwa wa wakazi wa dunia inakaribia kuamuliwa... Tunahitaji kuongozwa na Roho wa kweli...

Wengi wamedanganywa kuhusiana na hali yao halisi mbele za Mungu. Wanajipongeza kwa matendo mabaya ambayo hawayafanyi na wanasahau kuorodhesha matendo mema na yanayofaa ambayo Mungu anataka wayafanye, lakini ambayo wamezembea kuyafanya. Haitoshi kuwa wao ni miti katika bustani ya Mungu. Inawapasa kukidhi matarajio Yake kwa kuzaa matunda. Anawajibisha kwa kushindwa kutekeleza mambo yote mema ambayo walipaswa kuyafanya, wakitiwa nguvu kwa njia ya neema Yake. Katika vitabu vya mbinguni wameandikwa kama wataabishaji wa ardhi. Lakini hata tabaka hili sio kuwa halina tumaini kabisa. Hawa ambao wamedhihaki rehema ya Mungu na kudharau neema Yake, moyo wenye upendo na uvumilivu ungali unasihi. "Hivyo husema, Amka, wewe usinziaye, Ufufuke katika wafu, Na Kristo atakuangaza. Basi angalieni sana jinsi mnavyoenenda; ... mkiukomboa wakati kwa maana zamani hizi ni za uovu" (Waefeso 5:14-16).

Wakati wa kujaribiwa utakapofika, wale ambao wamelifanya neno la Mungu kuwa kanuni ya maisha yao watafunuliwa. Wakati wa kiangazi hakuna tofauti kati ya miti ya kijani na miti mingine; lakini wakati pepo za wakati wa hari zinapokuja, miti ya kijani hubaki bila kubadilika, wakati miti mingine ikivuliwa majani yote. Kwa hiyo mtu anayejifanya kuwa Mkristo yawezekana asitofautishwe na Mkristo wa kweli, lakini wakati umekaribia ambapo tofauti itaonekana. Hebu upinzani utokee, hebu ubaguzi wenye chuki na kukosa uvumilivu vishike hatamu, hebu mateso yawashwe, ndipo wenye mioyo isiyojitoa kikamilifu na wanafiki watakapoyumba na kuiacha imani; lakini Mkristo wa kweli atasimama kama mwamba, imani yake thabiti zaidi, tumaini lake litang'aa zaidi, kuliko katika siku za mafanikio.

Mtunga-Zaburi anasema: "Shuhuda zako ndizo nizifikirizo. Kwa mausia yako najipatia ufahamu, ndiyo maana naichukia kila njia ya uongo" (Zaburi 119: 99, 104).

"Heri mtu yule aonaye hekima." "Maana atakuwa kama mti uliopandwa kando ya maji, uenezao mizizi yake karibu na mto; hautaona hofu wakati wa hari ujapo, Bali jani lake litakuwa bichi; wala hautahangaika mwaka wa uchache wa mvua, wala hautaacha kuzaa matunda" (Mithali 3:13; Yeremia 17:8). (Pambano Kuu. Uk 496)

Thamani ya mti haitambuliwi kwa jina lake bali kwa matunda yake.